

15/07/2024

Aizawl

1830 Hrs

REGIONAL NEWS

HEADLINES:-

1. Cheng vaibelchhe 150 vel car loan lem hmanga, Mahindra & Mahindra Financial Services Ltd. in a tihchingpennaah, Mizorama car dealer 4 te an inhnawmawih ngei ni a hriat a ni .
2. Printing & Stationery Minister Pu F. Rodinglian zirlaite harsatna hrethiam in zirlaibu chhut a nih nghal theih nan ama Department sum hmanga chhut nghal vat a ni ang a ti.
3. Union Home Minister Amit Shah-a chuan vawiin khan tuilian tuar nasa Gujarat, Assam leh Uttar Pradesh Chief Minister te a bia
4. India leh Marshall Island chuan vawiin khan inremna thuthlung Memorandum of Understanding chi li an ziak.

<><><>

MIZORAM POLICE PR

Cheng vaibelchhe 150 vel car loan lem hmanga, Mahindra & Mahindra Financial Services Ltd. (MMFSL) in a tihchingpennaah, Mizorama car dealer 4 te an inhnawmawih ngei ni a hriat a ni a, Mizoram Police chuan a bultumtu Jakir Habibur Hussain leh a thurualpui mi 19 lakah Chargesheet pahnih a thelut.

He inbumna thilah hian CK Hyundai Cars, NBE TATA, Rafael Nissan leh AIDU Motors Renault te nen MMFSL te hi tanghovin hmarchhak bial pum tuamtu sum tih chingpenna lian ber pawikhawihna hi a thleng a ni.

Mizoram Police thuchhuah tarlan danin, he case chhui zuinaah hian Bank account 177, a belkhawma cheng vaibelchhe 5 awmna hren niin, car model hrang hrang 15 man a ni bawk. Heng car hlutna hi vaibelchhe 10.5 vel nia chhut a ni. Heng bakah hian customer lem loan lakna - 2035, seal leh stamp lem - 25, laptop - 3, mobile phone - 10, SIM Card - 35, mimal I.D engemaw zat leh pawikhawih nana hman ni ngeia hriat hmanrua eng engemaw man a ni bawk.

Hemi kaihawmawih ni ngeia lang thubuai dang ziah luh belh a ni a, Dr Lalnienga, Dy. Chief Medical Officer, Aizawl West District chuan tunhnai khan SBI Dawrpui Branch-a a CIBIL Score a check naah Mahindra & Mahindra Financial Services Ltd. (MMFSL) hnuaiah a hriat lohvin Vehicle loan la anga process a nih thu a hriat chhuah avangin complaint a thelut a, hetiang complaint hi mimal, an hriatpui lohva loanlem siamna atana an document an hmansakte hnen atangin a la luh belh zel turah Mizoram Police chuan a ngai a ni, an ti a, Hnuchhui hi la chhonzawm zel a ni a, midang inhnawmawih te pawh an la awm nia hriat a ni a, mihring leh bungrua man belh a awm a nih chuan chargesheet pawh a tul anga siambelh a ni ang, an ti.

Hetihlai hian, Mizoram Chamber of Commerce & Industries chuan vawiin khan thuthar thehdarhtute kawmin car dealer te thlavang hi an hauh a, Mahindra & Mahindra Financial Services LTD (Mahindra Finance), Aizawl Branch sum buai leh document lem tam tak siana Vehicle Loan lem an pek chungchanga Mizorama car zuartute hmer tel an ni chu a diklo a ni an ti a, hemi chungchangah hian Mizoram Motor zuartute an inhnawmawih velo a, Dik takin loan-in motor an

pekchhuah thin thu leh GST pawh rinawm takin Mizoram Sawkarah an lo chhunglut thin a ti bawk.

<><><>

DISASTER TRAINING

Disaster Management and Rehabilitation Department leh 1st Bn Mizoram Armed Police tang kawp ten kar thum chhung awh, chhiatrupna a lo thlen thulh a chhanchhuahna hna thawh dan tur zirna hun State Disaster Response Force te tan 1st Bn Mizoram Armed Police Headquarters, Aizawl Armed Veng ah training an buatsaih a.

He hun hi Joint Director (Operation), DM&R Pu PC Lalchungluran a kaihuai a, Disaster Management and Rehabilitation Department Secretary Pi K Lalrinzuali chuan Training-a tel te chu chhiatrupna a lo thlen thulh ah an thiamna te hmang tangkai a, tanpui ngai te tanpuitu ni thei turin theihtawp chhuah a training a tel turin a chah a ni.

State Disaster Response Force training ah hian 1st Bn MAP atangin mi 33 training turin an tel a. Disaster Management & Rehabilitation Department, Aizawl District Quick Response Team leh National Disaster Response Force lam a mithiam ten chhiatrupna a thlen thulh a hliam tuar chhanchhuah dan leh bawhsawm dan te, tuitla an awm a chhanchhuah dan te an zirtir a ni.

<><><>

MCC PRESS CONF

Mizoram Chamber of Commerce & Industries zirchianna a a landanin Aizawla thlai thar man to chhan chu a phurhna man to vang a ni.

MCCI President Pu K Lalhmingthanga chuan vawiin khan Aiozawl Press Club-ah chanchinbu mite kawmin, he thu hi a sawi a, tunhmaa thlai thar bus a phurh thin chu traffic tawt lutuk avangin maxi cab ah phurh a ni taa, a phurh man hi a into hleih viau avangin thlai man pawh a to phah ta a ni a ti.

Pu K Lalhmingthanga chuan kum 5 kalta atanga an zirchianna ah hmarchapui leh bawkbawn eikhawp Mizoramin a thar chhuak pha lo a ti a, heng thlai pahnihte hi phai lam atanga lakluh anih avangin a man pawh a to hle a, hei vang hian a thar hunloh lai pawha thar thei tur a hma lak theih an rin thu sawiin, Horticulture emaw Agriculture Department te hian research nei thei se an duh thu a sawi.

Sorkar chuan thil man to tur venna hmanrua ah Co-operative movement hmang se an duh tih a sawi bawk a, Mizofed chu Consumer Co-operative Federation an nih angin tuialhthei leh eirawngbawlina Gas bakah nitin mamawh chi hrang hrang zawrhchhuah kawngah hma la tel se, an hnathawh chu mipuiin an chhawr nasat leh zual an beisei tih a sawi.

<><><>

SCHOOL TEXT BOOKS

Mizoramah zirlaite'n Samagra Shiksha hnuaiia zirlaibu an la dawn kim loh chungchangah Mizo Zirlai Pawl MZP hruaituten Printing & Stationery Minister Pu F. Rodingliana an hmu a,

Pu F. Rodingliana chuan zirlaite harsatna hrethiam in zirlaibu chhut a nih nghal theih nan ama Department sum atanga zirlaibu chhut nghal vat a nih tur thu MZP hruaitute a hrilh tih MZP thuchhuah chuan a tarlang a.

MZP chuan, hemi chungchangah vek hian School Education Department changtu Minister chu hmuh an tum a, amaherawhchu an hmu theilo a, zirlaite harsatna tawh sukiang tura engtik lai pawh a awm tura ngaih an hmu thei lo chu an ngaithiamlo hle tih an sawi a ni.

Mizoram chhungah Samagra Shiksha hnuai zirlaibu a thlawn a sem la dawngkimlo school 1270 an la awm tih RTI act hmanga zawhna chhanna ah tarlan a ni a, Lekhabu la dawng kimlo te hi Primary school 581, Upper primary school/ Middle school 689 te an ni. Aizawl district ah Primary School 173 leh Middle School school 136 ten Lekhabu hi an la dawng kimlo a ni.

Mamit district ah school 236, Lawngtlai district ah school 206, Lunglei district ah school 164, Kolasib district ah school 88, Hnahthial district ah school 86, Champhai district ah school 62, Saitual district ah school 37, Khawzawl district ah school 36, Serchhip ah school 33 leh Siaha district ah school 13 ten lekhabu a thlawna sem tur hi anla dawng kimlo a ni.

Congress Thalai pawhin thuchhuah siamin, Mizorama school hrang hrang ten term Exam hmasa ber an Exam tan tawh laia, Mizoram chhungah zirlaibu la dawng kim lo school 1200 chuang an la awm chu pawh an tih thu an sawi a. Mizoram zirna sawpchhian nasa tak a thlengah an ngai tih an sawi a ni.

<><><>

UNION HM ON FLOOD

Union Home Minister Amit Shah-a chuan vawiin khan tuilian tuar nasa Gujarat, Assam leh Uttar Pradesh Chief Minister te a bia a. An state theuha tuilian avanga harsatna an tawh dan leh mipuite dinhmun a sawipui a. Pu Shaha chuan tui chim chin san zel dan te a zawt bawk a. sSawrkar laipui chuan tuilian tuarte chhawmdawl tur leh chhanchhuah hna thawh kawngah theihtawpa a puih tur thu a tiam a ni.

<><><>

INDIA AND MARSHALL ISLANDS

India leh Marshall Island chuan vawiin khan inremna thuthlung Memorandum of Understanding chi li an ziak. External Affairs Minister Dr. S Jaishankar-a chuan Community Development Projects palia inremna ziahnaah hian thusawiin Idnia leh Marshall Island te chu hun reitak ata inthiantha tawh an ni a ti a. Pacific thliarkar ramte chu thliar te mai an ni lova tuifinriat ram lian tak an ni a ti a. Hmasawna tluantling nei tura Pacific thliarkar ramten hma an lak meknaah India chuan nasa taka a puih tur thu a sawi a. Sik leh Sa inthlak, khuarel chhian, rethei chawikan leh healthcare te chu India leh Marshall Island ten harsatna an tawh a nih thu a sawi a. India chu an thawhpui ram a ni thei chu lawmawm a tih thu a sawi bawk a ni.

<><><>

NEPAL

KP Sharma Oli chu vawiin khan Nepal Prime Minister thar atan rinawmna thu tiam tira lakluh a ni. Prime Minister Oli-a rual hian Minsiter 21 lakluh tel an ni a. Heng minister te hi party tangrual pali atanga lakluh an ni a. President Ramchandra Paudel chuan minster te lakluh inkhawm hi a hruai a ni.

Prime Minister lakluh inkhawm hi Kathmandu-a Sheetal Niwas-a President Office ah neih a ni a. He hunah hian Vice President Ram Sahaya Prasad Yadav, Prime Minister hlui leh Nepali Congress President Sher Bahadur Deuba, Prime Minister hlui Pushpa Kamal

Dahal 'Prachanda', Speaker of the House of Representatives Devraj Ghimire te pawh an tel a ni.

Puan tawh angina Nepal President Ram Chandra Paudel chuan Communist Party of Nepal-Unified Marxist Leninsit chairman KP Sharma Oli hi nimin khan Prime Minister thar atan a ruat a. Prime Minister ni lai Pushpa Kamal Dahal Prachanda chuan karhmasa Zirtawpni khan House of Representative ah sawrkar bukna a paltlang zo a. Hei vang hian sawrkar thar siam a nih phah ta a ni.

<><><>